



Broj/ Број : 02/2-50-1-69-38-13/05
Sarajevo/ Сарајево : 25. 7. 2005.

Z A P I S N I K

38. sjednice Komisije za vanjsku i trgovinsku politiku Doma naroda Parlamentarne skupštine BiH održane 25. 7. 2005.

Tridesetosmu sjednicu Komisije za vanjsku i trgovinsku politiku Doma naroda Parlamentarne skupštine Bosne i Hercegovine sazvaio je predsjedavajući Komisije Hasan Čengić.

Sjednici su prisustvovali sljedeći članovi Komisije: Hasan Čengić, Anto Spajić, Vinko Radovanović, Osman Brka i Ruža Stojanović, kao i Nevenka Savić, sekretar Komisije.

Osim navedenih, sjednici su, u svojstvu predstavnika predlagača, prisustvovali: Ljerka Marić, ministar finansija i trezora; Sabrija Šerifović, pomoćnik ministra u Ministarstvu vanjske trgovine i ekonomskih odnosa; Davorka Ištuk i Esad Suljić iz Ministarstva vanjskih poslova; Andrijana Barišić, savjetnik u Predsjedništvu BiH; Kojo Koprivica, Nikola Šego i Šekara Mirko iz Ministarstva prometa i komunikacija; Željko Ivanković, šef INDOK službe u Sekretarijatu PS BiH.

Sjednicom je predsjedavao predsjedavajući Komisije Hasan Čengić. Nakon što je konstatirao da postoji kvorum, predsjedavajući Komisije je predložio sljedeći:

DNEVNI RED

1. Usvajanje zapisnika sa 37. sjednice Komisije;
2. Prijedlog zakona o osnovama sigurnosti prometa na cestama u Bosni i Hercegovini – predlažać Vijeće ministara BiH;
3. Saglasnost za ratifikaciju Kreditnog i finansijskog sporazuma između Kreditansalt für Wiederaufbau Frankfurt am Main KfW i Bosne i Hercegovine, Federacije Bosne i Hercegovine i Republike Srpske za rehabilitaciju gradskog vodovoda u Unsko-sanskom regionu – predlažać Predsjedništvo BiH;
4. Saglasnost za ratifikaciju Konvencije o tripartitnim konsultacijama u svrhu promoviranja implementacije međunarodnih standarda rada - predlažać Predsjedništvo BiH;
5. Informacija o stanju bilateralnih sporazuma koje je Bosna i Hercegovina zaključila sa Republikom Hrvatskom i Srbijom i Crnom Gorom o regulisanju pograničnog

saobraćaja i zajedničkih graničnih prijelaza – informacija Ministarstva vanjskih poslova BiH;

6. Analiza primjene ugovora o slobodnoj trgovini s posebnim osvrtom na ugovore BiH – Republika Hrvatska i BiH – Srbija i Crna Gora – informacija Ministarstva vanjske trgovine i ekonomskih odnosa BiH;
7. Kratka analiza vanjskotrgovinske razmjene BiH – informacija Ministarstva vanjske trgovine i ekonomskih odnosa BiH;
8. Unapređenje rada INDOK službe Sekretarijata PS BiH – Informacija Zajedničke službe Sekretarijata PS BiH;
9. Izvještaj o radu Komisije za vanjsku i trgovinsku politiku za period januar – juni 2005. godine;
10. Tekuća pitanja.

Dnevni red je jednoglasno usvojen.

Ad. 1. Usvajanje Zapisnika sa 37. sjednice Komisije

Zapisnik sa 37. sjednice Komisije jednoglasno je usvojen.

Ad. 2. Prijedlog zakona o osnovama sigurnosti prometa na cestama u Bosni i Hercegovini

Predsjedavajući Komisije upoznao je prisutne sa dosadašnjim tokom procedure razmatranja ovog Prijedloga zakona u Parlamentarnoj skupštini BiH. Naime, Prijedlog zakona je u predstavničkom domu usvojen u prvom čitanju i ponovo vraćen u komisijsku fazu sa produženjem roka za ulaganje amandmana. Članovi Komisije, a i prisutni predstavnici predlagača, složili su se da se nisu stekli uvjeti za razmatranje Prijedloga zakona u komisijskoj fazi u Domu naroda. Zbog velikog broja uložених amandmana i činjenice da Zakon nije usvojen u Predstavničkom domu, članovi Komisije su jednoglasno odlučili da zatraže od Kolegija Doma naroda produženje roka za podnošenje izvještaja nadležne komisije Domu naroda Parlamentarne skupštine BiH do 15. septembra 2005. godine.

Ad. 3. Saglasnost za ratifikaciju Kreditnog i finansijskog sporazuma između Kreditanstalt für Wiederaufbau Frankfurt am Main KfW i Bosne i Hercegovine, Federacije Bosne i Hercegovine i Republike Srpske za rehabilitaciju gradskog vodovoda u Unsko-sanskom regionu – predlagač Predsjedništvo BiH

U svojstvu predstavnika predlagača, o Sporazumu je govorila g-đa Marić. Ona je istakla da Sporazum predstavlja nastavak finansijske saradnje SR Njemačke i Bosne i Hercegovine i u njemu su precizno regulirani iznos i svrha kredita i doprinosa za investicije. Ovo je okvirni sporazum koga će pratiti supsidijarni sporazumi između entiteta i općina – krajnjih korisnika.

Ministar Marić je istakla da je dosadašnja implementacija prethodnih sporazuma išla redovno, te da su se zbog toga stekli uvjeti za potpisivanje ovog Sporazuma.

Nakon toga, članovi Komisije jednoglasno su odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Sporazuma.

Ad. 4. Saglasnost za ratifikaciju Konvencije o tripartitnim konsultacijama u svrhu promoviranja implementacije međunarodnih standarda rada - predlagač Predsjedništvo BiH

Predsjedavajući Komisije ukratko je prezentirao odredbe Konvencije, nakon čega su članovi Komisije jednoglasno odlučili da predlože Domu naroda Parlamentarne skupštine BiH da donese odluku o davanju saglasnosti za ratifikaciju Konvencije.

Ad. 5. Informacija o stanju bilateralnih sporazuma koje je Bosna i Hercegovina zaključila sa Republikom Hrvatskom i Srbijom i Crnom Gorom o regulisanju pograničnog saobraćaja i zajedničkih graničnih prijelaza – informacija Ministarstva vanjskih poslova BiH

U svojstvu predstavnika predlagača o Informaciji je govorila g-đa Ištuk. U diskusiji su učestvovali g. Čengić, g. Spajić i g. Radovanović. Članove Komisije je interesiralo da li postoje neki sporazumi sa R Hrvatskom ili Srbijom i Crnom Gorom koji su potpisani ali nisu ratificirani, ili sporazumi za koje je pregovaranje u toku. Članove Komisije je takođe interesiralo reguliranje graničnih prelaza sa Srbijom i Crnom Gorom.

Nakon diskusije, članovi Komisije su jednoglasno zaključili da se uputi dopis Vijeću ministara BiH u kome će se zatražiti informacija dokle se došlo sa aneksima ugovora o određivanju graničnih prelaza sa Srbijom i Crnom Gorom.

Ad. 6. Analiza primjene ugovora o slobodnoj trgovini s posebnim osvrtom na ugovore BiH – Republika Hrvatska i BiH – Srbija i Crna Gora – informacija Ministarstva vanjske trgovine i ekonomskih odnosa BiH

Informaciju je u svojstvu predstavnika predlagača prezentirao g. Šerifović. On je istakao da je od potpisivanja ugovora zabilježen veći izvoz u odnosu na izvoz, tj. da je zabilježen blagi pad trgovinskog deficita. G. Šerifović je rekao da postoji praksa tromjesečnog izvještavanja Vijeća ministara BiH o vanjsko-trgovinskoj razmjeni, a da od početka ove godine vanjsko-trgovinsku razmjenu prati Agencija za statistiku. Glavna primjedba na prezentirani materijal bila je da on predstavlja više informaciju a manje analizu. G. Šerifović je rekao da je to posljedica kadrovske nepopunjenosti Sektora za međunarodne trgovinske odnose u Ministarstvu. Sa suštinskog aspekta, ističe g. Šerifović, može se konstatirati da je BiH opredijeljena za liberalnu robnu razmjenu u kojoj nema zaštitnih mjera u pravilu. Taj princip se mora poštovati i u skladu je sa pravilima Svjetske trgovinske organizacije, Pakta stabilnosti i Sparazuma o stabilizaciji i pridrživanju čije se potpisivanje tek očekuje. Članovi Komisije su se složili da se razvojnim mjerama mora dati priritet, a čule su se konstatacije da se instituti za standardizaciju, mjeriteljstvo i certifikaciju moraju staviti u punu funkciju, da je potrebno više uključiti nauku u ova pitanja, da se roba koja se uvozi ne kontrolira, da nijedna institucija ne vodi evidenciju o viškovima proizvoda, te da problem s obzirom na njegovu kompleksnost treba sistemski rješavati. Diskusija se vodila i oko prijedloga mjera koje su navedene u materijalu, za koje je g. Šerifović rekao da nisu prošle proceduru usvajanja u Vijeću ministara BiH.

Na kraju diskusije, članovi Komisije su jednoglasno zaključili da se od Vijeća ministara BiH zatraži da u roku od 60 dana pripremi analizu primjene ugovora o slobodnoj trgovini s

posebnim osvrtnom na ugovore BiH – R Hrvatska i BiH – Srbija i Crna Gora sa zaključcima i prijedlogom mjera za smanjenje trgovinskog deficita. Po dobivanju materijala zatražiće se sastanak sa predsjedavajućim Vijeća ministara BiH i ministrom za vanjsku i trgovinsku politiku na kome će se razgovarati o ovoj temi.

Ad. 7. Kratka analiza vanjskotrgovinske razmjene BiH – informacija Ministarstva vanjske trgovine i ekonomskih odnosa BiH

Članovi Komisije su razmatrali ovaj materijal zajedno sa prethodnom tačkom Dnevnog reda, te su u skladu s tim usvojili Zaključak kao pod 6. tačkom Dnevnog reda.

Ad. 8. Unapređenje rada INDOK službe Sekretarijata PS BiH – Informacija Zajedničke službe Sekretarijata PS BiH

Šef INDOK službe prezentirao je u uvodu 3 materijala koje su članovi Komisije prethodno dobili na uvid: Plan rada INDOK službe za 2005. godinu, Aktivnosti INDOK službe u 2004./2005. godini i Suradnja OSCE – PSBiH 2005./2006. U svom izlaganju, g. Ivanković je govorio o urađenom u prethodnom periodu, kao i o problemima u radu Službe: kadrovskim, prostornim i tehničko-tehnološkim. Bilo je govora o problemu lektorisanja, prevođenja, lošoj opremi, nedovoljnim finansijskim sredstvima za opremanje biblioteke, Službi za odnose s javnošću. Članovi Komisije smatraju da treba više uraditi na popravljanju imidža Parlamentarne skupštine BiH u javnosti.

Članovi Komisije jednoglasno su odlučili da zatraže od Kolegija Sekretarijata PSBiH da prezentira cjelovito rješenje za unapređenje rada INDOK službe i ubrzaju proceduru donošenja Odluke o organizaciji Sekretarijata PSBiH.

Ad. 9. Izvještaj o radu Komisije za vanjsku i trgovinsku politiku za period januar – juni 2005. godine

Članovi Komisije su jednoglasno usvojili Izvještaj o radu i, u skladu sa članom 25. stav 3. Poslovnika Doma naroda, uputili ga Domu naroda na razmatranje.

Ad. 10. Tekuća pitanja

(a) Utvrđivanje datuma sastanka Upravnog odbora Uprave za indirektno oporezivanje i Komisije za vanjsku i trgovinsku politiku

Dogovoreno je da se uputi novi prijedlog termina za sastanak u drugoj polovini septembra mjeseca.

(b) Zaključci sa sastanka Komisije za vanjsku i trgovinsku politiku sa rukovodstvom Uprave za indirektno oporezivanje, održanog 21. 7. 2005. godine u Banjaluci

Članovi Komisije jednoglasno su zaključili sljedeće:

- Da se od Vijeća ministara BiH zatraži da što prije dostavi u parlamentarnu proceduru Zakon o Upravi za indirektno oporezivanje, Zakon o carinskim prekršajima, Zakon o postupku indirektnog oporezivanja i Zakon o postupku za

prinudnu naplatu, koji predstavljaju preduvjet za prelazak na novi poreski sistem od 1. 1. 2006. godine.

- Da se od Vijeća ministara BiH zatraži da zajedno sa Upravnim odborom Uprave za indirektno oporezivanje pripremi izmjene i dopune Zakona o porezu na promet proizvoda i usluga i Zakona o akcizama u BiH, kako bi se prevazišli problemi u njihovoj implementaciji.
- Da se od Vijeća ministara BiH zatraži da preduzme sve potrebne aktivnosti na uključenju BiH u Svjetsku carinsku organizaciju.

Predsjedavajući Komisije
Hasan Čengić